

## **LABek Maiatzaren Lehenean Laudion Tubacex-eko enpresa-batzordeak deitutako manifestazioan parte hartzeko deia egiten du**

Tubacexeko enpresa-batzordeak Aiaraldeko enpleguaren alde maiatzaren lehenean, 18:30ean, Laudion egin duen "Enpleguaren Defentsan Aiaraldean" eskualdeko manifestazioaren deialdiaren berri izan ondoren, LABetik honako hau jakinarazi nahi dugu:

.- Lehenik eta behin, bat egiten dugu Tubacex-eko enpresa-batzordeak egindako deialdiarekin, eta dei egiten diegu gure afiliatu eta jarraitzaile guztiei, bai eta eskualdeko gainerakoei ere, "Aiaraldeko enpleguaren aldeko" manifestazioan parte hartzera.

.- Bigarrenik, eta erabakia hartzea kostatu zaigun arren, LABek, 13:00etan, Tubacexetik hasita Laudion egingo genuen manifestazioa bertan behera uztea erabaki dugu, indarrak batzeko eta Tubacex-eko manifestazioan gure militantzia guztiaren presentzia bermatzeko. Uste dugu orain inoiz baino garrantzitsuagoa dela langile-klasearen batasuna, eta zentzu horretan hartu dugu erabakia, eta Tubacexen zein Aiaraldean honetarako lanean jarraituko dugu.

.- Aiaraldeko COVIDak baldintzatutako egungo egoeran bi manifestazio egiteko deialdiak, bi manifestazio horietako edozeini partaidetza eta eragina ken liezaiokeela uste dugu, eta horregatik baloratu dugu, Tubacex-eko langileek 129 kaleratzeen aurka egiten ari diren borrokari merezi duen lehentasuna ematea. Are gehiago Tubacex-en borroka Aiaraldeko enpleguaren suntsipenaren eta prekarietatearen aurkako erreferentzia, elkargune eta bultzada-punta bihurtu denean, eta deialdi hau eskualde osoko enpleguaren defentsan izanik.

.- Manifestazioa bertan behera utzi arren, maiatzaren 1erako LABetik programatutako gainerako ekitaldiekin jarraituko dugu, goizean kotxe karabana bat egingo dugu Aiaraldean, Urduñako goizeko 10:00etan hasita, eta argazki erakusketa bat Laudion, Iñaki Montes LABeko delegatu eta argazkilariaren eskutik, Tubacexeko langileek 76 egun hauetan egiten ari diren greba eta borrokari buruzko erakusketa.

Azkenik, antolatzeko eta borrokan jarraitzeko deia egin nahi dugu, bai Tubacexen, bai Aiaraldean, bai Euskal Herri osoan. Gure eskualdean azken hilabeteetan gertatzen ari den bezala, asko gara kaleratzeen kontra, prekarietatearen aurka, pensio duinen alde, zerbitzu publiko sendoen alde... borrokatzen ari garenak. Norabidea aldatzeko aukera dugu, antolaketa- eta borroka-bide horretan jarraitzen badugu. Aldaketa da aukera!

Gora maiatzaren lehena!  
Gora langileon borroka

Laudion, 2021eko apirilaren 27an